



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Komunikadu Imprensa**

**Tribunál Distritál Suai**

**26 Janeiru 2018**

**JSMP husu Ministériu Públiku atu akuza arguidu tuir krime nia gravidade iha kazu violénsia domestika ne'ebé envolve lezada isin-rua todan**

Iha 15 Dezembru 2017, Tribunal Distritál Suai kondena arguidu FRC ne'ebé komete ofensa ba integridade fízika simples ho natureza violénsia doméstika hasoru nia feen ne'ebé iha kondisaun gravida (isin-rua) fulan neen (6) ho pena prizaun fulan 6 no suspende ba tinan 1 no selu mós kustu judisiál US\$20.00.

Prokuradór akuza katak iha 13 Agostu 2016, iha oras 08.30 dader, arguidu tuku dala 1 iha lezada nia kabaas parte loos, rasta lezada nia fuuk no rezulta lezada monu ba rai no arguidu kontinua hanehan lezada nia kanuruk ba rai. Iha akontesementu ne'e lezada gravida hela fulan neen no agresau ne'e kauza lezada tenke baixa iha ospitál durante kalan 1.

Prokurador akuza arguidu kontra artigu 145 Kódigo Penál (KP) kona-ba ofensa ba integridade fízika simples ho moldura penal too tinan 3 ka multa no konjuga ho artigu 2, 3 (letra a) no artigu 35 (letra b) LKVD.

“Prokuradór tenke asegura katak akuzasaun sira iha kazu violénsia doméstika tuir duni gravidade hosi krime ne'ebé arguidu komete no bele fó fatin ba tribunál fó justisa ne'ebé justu ba lezada no prevene krime hanesan iha sosiedade,” dehan Diretór Ezekutivu JSMP, Luis de Oliveira Sampaio.

JSMP hanoin katak artigu 145 KP ne'ebé Prokuradór akuza la relevante ho krime ne'ebé mak arguidu komete. Tanba iha akontesementu ne'e lezada iha kondisaun ne'ebé gravida hela no perigu tebes ba nia vida. Aktu ne'e rezulta lezada tenke baixa iha ospital durante kalan ida.

Normalmente feto ho kondisaun isin-rua iha presau psikolójiku oioin, no wainhira hetan violénsia hanesan ne'e sei prejudika liután nia saúde fíziku no psikolójiku ne'ebé bele lori amiasa ba nia vida rasik no ba ninia bebe (*janin*). Peskiza barak hatudu katak efeitu psikolójiku nia risku ba feto isin rua boot liu fali efeitu fíziku. Arguidu konsiente ka bele prezume katak nia hahalok ne'e bele prejudika lezada nia saúde fíziku no emosionál nomós efeitu adisionál sériu ba bebe ne'ebé iha hela lezada ninia kabun laran.

Rua Beco Lakateu, Aldeia Manu fuik, Suku Colmera, Administrativu Vera Cruz

Dili Timor Leste

PoBox: 275 Telephone: 3323883 | 77295795

www.jsmp.tl [info@jsmp.tl](mailto:info@jsmp.tl)

Facebook: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl

Tanba ne'e, tuir loloos ba kazu ne'e Prokurador tenke akuza ho artigu 146 (e) Kodigo Penál kona-ba ofensa ba integridade física grave ne'ebé hamosu perigu ba lezada nia vida.

Artigu 146 (e) KP kona-ba ofensa ba integridade física grave defini katak se maka ofende ema seluk nia isin ka saúde ho intensaun atu: ...e) hamosu perigu ba nia vida, sei hetan pena prizaun tinan 2 too tinan 8.

Prokurador kaer papel importante atu asegura faktu relevantes sira inkorpora iha akuzasaun no eskolla provizaun ne'ebé apropriadu liu iha kazu ne'e. Prokurador tenki avalia profundamente faktu relevantes sira iha kazu violénsia doméstika atu nune'e desizaun ne'ebé Tribunál hatun ba arguidu tuir duni krime ne'e ninia gravidade ne'ebé arguidu komete.

Iha julgamentu, arguidu konfesa faktus hotu iha akuzasaun, arguidu mós deklara katak foin primeira-vez mai hatan iha Tribunál, diak malu ona ho lezada, arrepende ona ninia hahalok no promete iha futuro sei la komete tan krime hanesan hasoru lezada. Iha parte seluk lezada konfirma no kontinua reforsa faktus sira iha akuzasaun.

Iha alegasaun finál, Prokurador konsidera arguidu provadu komete krime hasoru lezada tuir faktus sira iha akuzasaun no husu ba Tribunál atu kondena arguidu ho pena prizaun fulan 6 no suspende ba tinan 1.

Iha parte seluk, Defeza husu atu Tribunál fó pena ne'ebé adekua tanba arguidu konfesa, arrepende ninia hahalok no foin primeira-ves mai hatan iha Tribunal.

Kazu ne'e rejista iha Tribunál ho Nú. Prosesu: 0007/16.MFSIC. Julgamentu ne'e prezide husi juis singulár Dra. Florensia Freitas, Prokurador representa husi Dra. Napoleão Soares da Silva no arguidu hetan Defeza hosi Dr. Francisco C. Martins hosi Defénsoria Públiku.

Atu hetan informasaun kompleitu bele kontaktu ba:

Luis de Oliveira Sampaio  
Diretor Ejecutivo JSMP  
E-mail: [luis@jsmp.tl](mailto:luis@jsmp.tl)